

Curso lo recobra conocimiento riba tecnica tradicional di calki

ORANJESTAD - Stichting Monumentenfonds Aruba (SMFA) a anuncia cu lo cuminsa cu e restauracion di e forno di calki den pleno curason di Rancho denter di un luna.

E unico forno di calki cu a keda na Aruba tin 127 aña bieu, despues di a wordo construi na 1892. E forno aki ta un di e monumentonan industrial mas importante di nos isla.

Na principio di aña durante un conferencia na Bermuda, SMFA a logra yega na acuerdo cu Parvenir Heritage Restoration and Maintenance Company Ltd. pa restaura e forno di calki. E obhetivo tabata pa restaur'e segun e sistema tradicional cu uzo di calki. Pero alabes combina esaki cu un curso pa asina nos hende por siña e tecnica aki y traspasa e conocimiento. E meta ta pa por crea e experticio local pa por ehecuta proyectonan di mantencion

y restauracion di otro monumentonan tambe, segun e forma corecto.

Cu añanan nos a mira cu e conocimiento y experticio ta bayendo perdi y pa medio di e curso aki lo kier trece esaki bek. Un aspecto cu directora di Unoca a balora ya cu e parti di nos herencia cultural no material.

E oportunidad pa adkiri e conocimiento aki ta pa tur esunnan interesa, pero principalmente personanan cu ta traha den area di construccion, arkitektanan, y metslanan. Pero tambe doñonan di casnan tradicional cu kier siña e manera corecto pa por aplica e pleister a base di calki.

Banda di esaki SMFA tambe lo duna oportunidad na personanan buscando un segundo oportunidad den bida. Esaki lo bay via di fundacionnan manera Stichting Rancho y Adopt An Addict pa asina por siña e tecnica aki y haya e oportunidad den futuro tambe pa traha riba proyectonan di restauracion y mantencion di monumentonan.

Por ultimo tambe a acerca EPI pa asina duna tanto docentenan como studentenan e oportunidad pa siña un tiki mas tocante e tecnica tradicional di uzo di calki.

Contenido

E curso ta consisti di un sesion teoretico cu lo ta dia 23 di september y un sesion practico cual lo tuma luga di dia 24 di september te dia 27 di

september. Participantenan cu participa na tur dos sesion lo ricibi un certificado for di Enseñansa pa Empleo.

Personanan interesa pa registra por tuma contacto cu SMFA na info@monumentenfondsaruba.com of 5824014 of por registra via e link riba e pagina di facebook di Stichting Monumentenfonds Aruba.

Stichting Monumentenfonds

Aruba kier a gradici na Unoca y Prins Bernhard Cultuurfonds Caribbean cu a contribui cu fondonan pa asina por haci e curso aki posibel. Tambe e fundacion aki a duna un danki na partnernan cu a uni na e proyecto aki cual ta Stichting Rancho, Ministerio di Cultura, Enseñansa pa Empleo Aruba, Museo Arkeologico y Parvenir Heritage Restoration & Maintenance Company Ltd.

